


Shërbimi i Secans
Planam.
W. V. R.



REPUBLIKA E SHQIPËRISË
KUVENDI
GRUPI PARLAMENTAR I PARTISË SOCIALISTE

Nr. _____ prot

Tiranë, më ____ .10.2025

Lënda: Depozimin projektligji

Z.NIKO PELESHI
KRYETAR I KUVENDIT

I nderuar z. Kryetar,

Në mbështetje të nenit 81, pika 1, të Kushtetutës të Republikës së Shqipërisë dhe nenin 68 të Rregullores së Kuvendit, ju paraqesin projektligjin “Për disa shtesa dhe ndryshime në ligjin nr. 15, datë 5.03.2015 “Për rolin e Kuvendit në procesin e integritetit të Republikës së Shqipërisë në Bashkimin European” i ndryshuar.

DEPUTETËT PROPOZUES

1. Borç Muzhaqi
2. Tahir Beqiri



REPUBLIKA E SHQIPËRISË
KUVENDI

PROJEKTLIGJ

**PËR DISA SHTESA DHE NDRYSHIME NË LIGJIN NR. 15, DATË 5.3.2015
“PËR ROLIN E KUVENDIT NË PROCESIN E INTEGRIMIT TË REPUBLIKËS
SË SHQIPËRISË NË BASHKIMIN EUROPIAN”, I NDRYSHUAR**

Në mbështetje të neneve 78 dhe 83, pika 1, të Kushtetutës, me propozimin e një grupi deputetësh,

K U V E N D I

I REPUBLIKËS SË SHQIPËRISË

V E N D O S I:

Në ligjin nr. 15, datë 5.3.2015, “Për rolin e Kuvendit në procesin e integrimit të Republikës së Shqipërisë në Bashkimin Europian”, i ndryshuar, bëhen këto shtesa dhe ndryshime:

Neni 1

Titulli i ligjit ndryshon si më poshtë:

“Për rolin e Kuvendit në procesin e negociatave dhe anëtarësimit të Republikës së Shqipërisë në Bashkimin Europian”.

Neni 2

Kudo në përmbajtje të ligjit emërtimi “Komisioni për Çështjet Europiane” zëvendësohet me emërtimin “komisioni përgjegjës për çështjet për Europën”.

Neni 3

Në nenin 1 fjala “integrimit” zëvendësohet me togfjalëshin “negociatave dhe anëtarësimit”.

Neni 4

Neni 2 ndryshon si më poshtë:

“Neni 2

Objekti

Objekti i këtij ligji është përcaktimi i rregullave dhe procedurave për rolin e Kuvendit në procesin e negociatave dhe anëtarësimit të Republikës së Shqipërisë në Bashkimin Europian.”.

Neni 5

Neni 3 ndryshohet si më poshtë:

“Neni 3

Fusha e veprimit të ligjit

Fusha e veprimit të këtij ligji ka të bëjë me:

- a) marrëdhëniet dhe bashkëpunimin me Këshillin e Ministrave dhe ministrit dhe/ose kryenegociatorit përgjegjës për negociatat me Bashkimin European, institucionet e pavarura dhe ato të krijuara me ligj, në kuadër të negociatave me Bashkimin European;
- b) monitorimin e zbatimit të kuadrit normativ dhe të politikave në lidhje me procesin e integritetit european, si dhe asistencën financiare të ofruar nga Bashkimi European;
- c) monitorimin e procesit të negociatave;
- ç) procedurat për miratimin e akteve ligjore që përafrojnë legjislacionin shqiptar me *acquis* të Bashkimit European dhe akteve ligjore për plotësimin e kushteve dhe kritereve për anëtarësim;
- d) komunikimin dhe informimin nga Kuvendi të shoqërinë civile dhe grupeve të interesit për procesin e negociatave dhe impaktin e anëtarësimit të Republikës së Shqipërisë në Bashkimin European.”.

Neni 6

Në nenin 4 bëhen ndryshimi dhe shtesat e mëposhtme:

1. Shkronja “gj” ndryshon si më poshtë:
“gj) “pozicion negociues” është pozicioni që do të prezantojë Republika e Shqipërisë për kapituj ose grup kapitujsh të caktuar.”.
2. Pas shkronjës “gj” shtohen shkronjat “h”, “i”, “j”, “k”, “l”, “ll” dhe “m” me këtë përmbajtje:
 - h) “Grupim i kapitujve” është një grupkapitujsh bazuar në metodologjinë e rishikuar për negociatat e aderimit në Bashkimin European, miratuar nga BE-ja në vitin 2020, sipas ndarjes në 6 (gjashtë) grupime tematike.
 - i) “Qëndrimi i Përbashkët i BE-së” është qëndrimi dhe objektivat e unifikuara të përcaktuara nga Shtetet Anëtare të BE-së dhe Komisioni European për procesin e aderimit në Bashkimin European.
 - j) “Piketat e hapjes, të ndërmjetme dhe të mbylljes” janë kushte dhe objektiva specifike të vendosura nga Bashkimi European që një vend kandidat duhet të përmbushë për të arritur përparim gjatë procesit të negociatave të integritetit në BE, veçanërisht për hapjen dhe mbylljen e përkohshme të kapitujve negociues.
 - k) “Plani i përafrimit” është lista e akteve ligjore dhe rregullatore dhe/ose masa shoqëruese të tjera që hartohen, miratohen dhe zbatohen për të përafruar legjislacionin kombëtar me *acquis* të BE-së në një periudhë të caktuar kohore dhe/ose për të përmbushur piketat.
 - l) “Procedura e përshpejtuar” për miratimin e ligjeve, që synojnë përafrimin me *acquis communautaire* është një proces legjislativ i posaçëm, i cili lejon shqyrtimin dhe miratimin më të shpejtë të projektligjeve që lidhen me detyrimet e Shqipërisë për integritetin në Bashkimin European.
 - ll) “Procesi i integritetit” në Bashkimin European është një proces politik, juridik dhe institucional, përmes të cilit një shtet kandidat harmonizon dhe përshtat legjislacionin, institucionet dhe politikat e tij me *acquis*, me qëllim përmbushjen e kritereve të anëtarësimit dhe kushtet e tjera të vendosura nga BE-ja.
 - m) “Procesi i anëtarësimit” në Bashkimin European është procedura formale me anë të së cilës një shtet kandidat zhvillon negociatat me BE-në, hap dhe mbyll kapitujt e *acquis*, përmbush kriteret e përcaktuara dhe, pas përfundimit të tyre me sukses, nënshkruan dhe ratifikon Traktatin e Anëtarësimit që i jep statusin e shtetit anëtar.”.

Neni 7

Neni 5 ndryshohet si më poshtë:

“Neni 5

Parimet dhe objektivat e përgjithshme

Procesi i negociatave dhe anëtarësimi i Shqipërisë në Bashkimin European bazohet në parimet dhe objektivat e mëposhtme:

- a) promovimi dhe mbrojtja e interesave strategjike kombëtare të Shqipërisë;
- b) përmbushja e kriterëve politike, ekonomike, ligjore dhe institucionale të kërkuara për anëtarësimin në BE;
- c) respektimi i parimeve të shtetit të së drejtës, të mbrojtjes së të drejtave dhe lirive themelore të njeriut, të ligjshmërisë, të subsidiaritetit, të proporcionalitetit, të bashkëpunimit reciprok, të transparencës, të gjithëpërfshirjes dhe të ekonomisë së tregut.”.

Neni 8

Në nenin 6 bëhen ndryshimet si më poshtë:

1. Në pikën 1 togfjalëshi “për integrimin european” zëvendësohet me togfjalëshin “për anëtarësimin në Bashkimin European”.
2. Në fund të fjalisë së pikës 1 fjala “integrim” zëvendësohet me fjalën “anëtarësim”.
3. Pika 2 ndryshon si më poshtë:
“2. Këshilli Kombëtar i Integrit bashkëdrejtohet nga bashkëkryetari dhe bashkënkryetari i delegacionit shqiptar në Komitetin Parlamentar për Stabilizim-Asociim”.

Neni 9

Në nenin 7, në pikën 1 bëhen këto ndryshime:

1. Shkronja “a” ndryshon si më poshtë:
“a) nxit bashkëpunimin midis forcave politike, institucioneve shtetërore dhe të pavarura, shoqërisë civile dhe grupeve të tjera të interesit në procesin e negociatave dhe anëtarësimit të Republikës së Shqipërisë në Bashkimin European”.
2. Në shkronjën “e” fjala “kryetarit” zëvendësohet me fjalën “bashkëkryetarët”.

Neni 10

Neni 10 ndryshohet si më poshtë:

“Neni 10

Komisioni përgjegjës për çështjet për Europën

Komisioni përgjegjës për çështjet për Europën është organ i përhershëm i Kuvendit, i cili mbulon çështjet e negociatave dhe anëtarësimit në Bashkimin European.

Kompetencat e Komisionit përgjegjës për çështjet për Europiane përcaktohen në Rregulloren e Kuvendit të Republikës së Shqipërisë, si dhe në këtë ligj.”

Neni 11

Në nenin 12 shtohet pika 3 me këtë përmbajtje:

“3. Kuvendi bashkëpunon me Parlamentin European dhe parlamentet e Shteteve Anëtare në kuadër të mbështetjes së procesit të negociatave dhe anëtarësimit të Republikës së Shqipërisë në Bashkimin European.”.

Neni 12

Në nenin 13 bëhen ndryshimet dhe shtesa si më poshtë:

1. Titulli i nenit 13 ndryshon me këtë përmbajtje: “Bashkëpunimi dhe bashkëveprimi me Këshillin e Ministrave.”

2. Pika 1 ndryshon si më poshtë:

“1. Këshilli i Ministrave bashkëpunon dhe bashkëvepron me Kuvendin për çështje që lidhen me:

- a) procesin e negociatave për anëtarësimin e Republikës së Shqipërisë në Bashkimin European;
- b) procesin e përafrimit të legjislacionit kombëtar shqiptar me legjislacionin e BE-së;
- c) angazhimin me shoqërinë civile dhe grupet e interesit dhe komunikimin në kuadër të e procesit të integritetit/anëtarësimit të Republikës së Shqipërisë në Bashkimin European;
- ç) projekt marrëveshjet dhe konventat që duhen miratuar me Bashkimin European, në kuadër të procesit të anëtarësimit të Shqipërisë në Bashkimin European;
- d) projektaktet që kanë të bëjnë me angazhimet në traktatet e Bashkimit European, me përjashtim të akteve administrative;
- dh) projektaktet e të drejtave dhe detyrimeve që rrjedhin në mënyrë jo të drejtpërdrejtë dhe që janë të rëndësishme për Republikën e Shqipërisë;
- e) projektaktet që kanë të bëjnë me përdorimin e fondeve të Bashkimit European.”.

Neni 13

Në nenin 14/1 pikat 2 dhe 3 ndryshohen si më poshtë:

“2. Komisioni përgjegjës për çështjet për Europën e përfshin menjëherë pozicionin negociues dhe shtesat/ndryshimet e tij në kalendarin e punimeve të Komisionit dhe e shqyrton jo më vonë se 7 ditë nga data e përfshirjes së pozicionit negociues në kalendarin e punimeve të tij.

3. Në rast se pozicioni negociues dhe shtesat/ndryshimet e tij nuk janë përfshirë në kalendarin e punimeve të Komisionit brenda 3 ditëve nga data e paraqitjes të tij, ai automatikisht konsiderohet i përfshirë në kalendar dhe shqyrtohet jo më vonë se 7 ditë nga data e përfshirjes në kalendar.”.

Neni 14

Në nenin 15 pas pikës 2 shtohet pika 3 me këtë përmbajtje:

“3. Kuvendi harton kalendarin me ligjet që përafrojnë legjislacionin me *acquis* të Bashkimit European.”.

Neni 15

Në nenin 17 bëhen shtesa dhe ndryshimi i mëposhtëm:

1. Në pikën 1 në fund të fjalisë pas fjalës “përgjegjësisë” shtohen fjalët “dhe rregullave procedurale të përcaktuara në Rregulloren e Kuvendit.

2. Pika 4 ndryshon si më poshtë:

“4. Institucionet propozuese të projektligjit krijojnë bazën e të dhënave të tabelave të përputhshmërisë së ligjeve të miratuara, të përditësuara.”.

Neni 16

Neni 17/1 ndryshon si më poshtë:

“Neni 17/1

Procedura e shqyrtimit të ligjeve që synojnë përafrimin

Kuvendi i Republikës së Shqipërisë përfshin menjëherë në programin dhe kalendarin e tij të punimeve dhe shqyrton me procedurë të përsheptuar ligjet që synojnë përafrimin e legjislacionit, marrëveshjet që lidhen me zbatimin e Marrëveshjes së Stabilizim-Asociimit dhe/ose detyrimeve që dalin nga procesi i negociatave të anëtarësimit, **me përjashtim të ligjeve të parashikuara në nenin 81, pika 2, të Kushtetutës.**”.

Neni 17

Në nenin 18 bëhen këto shtesa:

1. Në pikën 2 pas fjalëve “Raportit të Progresit” shtohen fjalët “për procesin e negociatave”.
2. Në pikën 3 në fund të fjalisë pas fjalëve “Bashkimi European” shtohen fjalët “për anëtarësim”.

Neni 18

Neni 19 ndryshon si më poshtë:

“Neni 19

Raportimi në Komisionin përgjegjës për çështjet për Europën

1. Ministri përgjegjës për negociatat me Bashkimin European dhe/ose Kryenegociatori paraqesin në fund të çdo 4-mujori në komisionin përgjegjës për çështjet për Europën një raport përmbledhës për:

- a) progresin mbi procesin e përafrimit me *acquis* të BE-së;
- b) ecurinë e procesit të negociatave dhe anëtarësimit në Bashkimin European;
- c) ecurinë e ndjekjes së rekomandimeve (të pranura) të Komisionit përgjegjës për çështjet për Europën lidhur me pozicionin negociues;

2. Me kërkesë të komisionit përgjegjës për çështjet për Europën ose të 1/3 së anëtarëve të tij, ministri përgjegjës për negociatat dhe/ose Kryenegociatori me Bashkimin European thirret për të informuar për çdo çështje që ka të bëjë me negociatat e Republikës së Shqipërisë në Bashkimin European.”.

Neni 19

Neni 20 ndryshon si më poshtë:

“Neni 20

Raportimi i institucioneve të pavarura

Komisioni përgjegjës për çështjet për Europën dhe komisionet e përhershme të Kuvendit, sipas fushave përkatëse të përgjegjësisë, mund të thërrasin institucionet e pavarura kushtetuese dhe institucionet e krijuara me ligj, që raportojnë dhe informojnë Kuvendin, për të raportuar dhe për të dhënë informacione, në çdo kohë, për zbatimin e detyrimeve të procesit të integritetit european dhe zbatimit të kuadrit ligjor përkatës.”

Neni 20

Në nenin 23 pika 1 ndryshon si më poshtë:

“1. Kuvendi përcakton rregullat e bashkëpunimit me shoqërinë civile dhe grupet e interesit për angazhimin dhe informimin e tyre lidhur me angazhimet në procesin e anëtarësimit në Bashkimin European duke garantuar transparencën e veprimtarisë së tij për çështjet e integritetit european dhe gjithëpërfshirjen e shoqërisë civile dhe grupeve të interesit në këtë proces.”.

Neni 21

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

K R Y E T A R I

Niko PELESHI